

宋朝大詔令集

宋朝大詔令集卷第一百三十九

典禮二十四

祔廟下

祔章獻明肅皇后于章穆皇后之次詔

慶曆五年七月乙巳

國之大典無若宗廟之制為重也比朕以奉慈三室未登禘祫之位四時之感每懷靡寧故命奉常講求舊章而又參質于近臣考詳於宰司庶無謬違以竭誠盡孝而卿等稽正衆論奏章來上乃曰緣人情而制禮則切而有實奉先訓以作古則顯而易遵載味此言實契朕志祇覽祥符之詔深原文考之旨極意尊親之際重興升降之辭故以祔廟之歲時用為合饗之次序義無差別情靡重輕矧在菲涼欽率成憲今日之議敢或異諸先廟祔九德故事恭依禮官奉章獻明肅皇太后序於章穆皇后之次上承奉先之順下成繼志之美永

修明祀翼享靈心

社章獻明肅皇后于真宗室冊文

維慶曆五年歲次乙酉十月癸丑朔九日辛酉孝子嗣皇帝臣某恭
聞宗廟之制昭穆有定位禘祫有常禮是故婦緣姑次所以示恭順
之大后從帝饗所以隆思義之至憲度昭布典經具存伏惟章獻明
肅皇太后陰教純備寶慈炳廸膺荷顧託保康冲眇延洪積累之慶
增固盈成之守以豐功溥博至德曼羨流之於廣宇浹之於生民向
采攸司之議遂崇別廟之薦瞻言闕祐尚隔太宮禮典之所未宣神
心之所未協至於霜露濡降春秋裸獻惕然念慮竄無遑寧是用講
配食之明文稽奉先之正範上以率乎大誼下以詢乎羣謀謹遣攝
太尉佐理功臣光祿大夫行尚書戶部符郎同中書門下平章事兼
樞密使昭文館大學士監修國史兼繹經潤文使上柱國常平郡開

國公食邑三千戶食寶封陸伯戶賈昌朝奉玉冊玉寶改上徽名曰
章獻明肅皇后升祔真宗廟室伏惟降格光靈昭孚顧謐丕侑聖考
永嚴宗祫素休寶圖錫佑生齒世世潔祀底于無疆

祔章懿皇后于真宗室冊文

孝子嗣皇帝臣某恭以孝莫大乎顯親禮莫大乎嚴配父以配天母
以配父若稽古先帝推本禮意神宗三后並升祐室敢率成憲參用
羣策恭祔昭主合食于位伏惟章懿皇太后徽德坤載融積月累永
嘉齊采靜淵粹和誕集慶靈克昌基祚維眇躬之續服悼慈顏之早
隔緬懷鞠育哀悼罔極頃從推制就饗別廟日月其邁昭穆未正爰
稽舊典陟序禰宮庶伸追養之誠以明欲報之志謹遣攝太尉推忠
協謀佐理功臣金紫光祿大夫尚書工部侍郎同中書門下平章事
兼樞密使集賢殿大學士上柱國潁川郡開國公食邑二千八百戶

食寶封陸伯戶陳執中奉玉冊玉寶改上徽名曰章懿皇后升祔真
宗廟室恭惟神監歆茲吉蠲永侑文考百世不遷流徽音於彤管光
泚範於青編禴祠烝嘗斯萬斯年

章獻章懿皇后升祔太廟款

朕荷穹昊之睭紹祖宗之緒恢宅函夏靖康羣生何嘗不講求善經
稽合古訓以格至順以循天中恭念二慈之親並膺先帝之託章獻
明肅皇后宣導陰教輔隆實業章懿皇后丕擁慶羨實生眇冲顧復
之恩深保綏之念重神馭長往仙遊茲邈嗟予為天下之母育天下
之君不迫乎九重之承顏不及乎四海之致養念言一至追慕增結
向崇閼宮之制未侑太室之饗參驗故實懼非經據遂稍敷旦交舉
盛儀工師恊恭海寓延曠咸扶祀事式寧神心上以伸罔極之孝思
下以厚重號之風教宜誕均於純嘏俾周暨於普天可大赦天下云

云於殿陟配奉親所以尊神靈於冥漠擁休肆肯所以致動植於清
明考諸前謨茲實大典尚賴三事庶尹列辟衆司交輸有恪之誠共
底無疆之福咨爾中外體予意焉

仁宗祔廟畢曲赦兩京德音

嘉祐八年十一月己酉

朕欽承先烈嗣守丕圖奄鍾同軌之期甫畢因山之制哀榮在疚感
慕增懷然念寢園獲襄事之終廟祐嚴反虞之祔典章備具營奉肅
祇茲皆中外協心士民動力因舉恤勞之報宜推惠施之恩於殿懷
終追遠孝理之所先肆赦肯災仁政之攸尚更賴恭獻列辟竭節懋
忠毗予一人永底于治咨爾羣庶當體至懷

英宗山陵祔廟畢兩京節孟減降德音

治平四年

門下朕祗膺駿命紹宅丕基遵仍几之訓言舉因山之儉制顧惟冲
菲備在哀覽賴穹厚之延休暨臣民之協力寢園備物既畢於反虞

廟室寧神已嚴於升祔唯事經之克濟率典禮以無愆宜推厚下之仁用篤慎終之制應西京鄭州孟州犯死罪已下降一等杖已下釋之云云於戲奉先昭孝實本於天經肆皆推恩蓋循於國典咨爾有衆欽予至懷

慈聖山陵祔廟畢曲赦西京河陽德音

元豐三年三月戊子

門下朕違卹東朝祇述儉訓爰因山而宅吉造祔廟以薦嘉儀物具嚴神靈來妥顧眇躬之在疚幸丕事之有成率繫衆謀允迪徂指宜頒帝號用格驩心應兩京畿內河陽管內三月戊子以前見禁罪人云云於戲維慎終可以厚民維奉先可以昭孝肆是近圻之涇澤本予太母之遺仁咨爾羣黎尚孚至意

升祔四后四京德音

孝惠孝章恭懷
元豐六年七月丙辰

門下朕荷昊穹之瞻席累聖之休奉承郊宮刺六經之成憲崇事祖

妣放二帝之彌文永懷四后之慈輔翊三朝之治俛天生德為丙殿
之元妃儼極嗣徽宅琳庭之正位向採曲臺之論未陪清廟之祠援
魯頌閟宮之文違周人同几之義肆惟菲德獲紹寶圖若稽古昔之
大猷斟酌播紳之輿議消辰升配備物肆儀設重翟之車嚴中宮之
服御奉四時之祀侑太室之威神燕寧靈心稱秩禮典下以厚丕平
之風教上以申罔極之孝思宜覃恩休以惠京甸應四京畿內限德
音到日見禁罪人云云於戲宗廟之重豈予一人之敢專濡澤之行
宜爾近民之克暨布告在位當體朕懷

神宗山陵畢兩京畿內河陽德音

元豐八年十一月辛丑

門下朕罹國大憂紹天明命七月同軌至誕啟裕陵之封四方以和
來遂升清廟之祔顧惟冲眇固極哀恫遵仍几之言雖隆儉約之制
危大升之駕亦多營奉之勞嘉中外之協心暨士民之宣力宜均霈

澤以迪舊章應兩京畿內河陽管內德音到日以前見禁罪人死罪以下遞降一等杖罪以下釋之應奉官量與恩澤人戶緣山陵事致妨耕種者免租稅有差欠官物非侵盜者特與除放於戲惟送終可以當大事蓋先王之所甚難惟推恩足以保斯民固人心之所同悅咨爾有衆體予至懷

宣仁祔廟畢兩京河陽鄭州德音

紹聖元年二月癸亥

門下遺難東朝送終西洛遺誥訓儉因山永厚之陰成事薦嘉祥祐英皇之室天時助順民氣協恭永懷亘極於遐邇畢給多從於近甸神靈休寓始卒安行推本德心肆嘉惠澤應兩京畿內河陽鄭州德音到日以前見禁罪人除常赦所不原減外其餘死罪遞降一等至杖釋之云云於戲叙勞次賞不遺大小之功有罪矜刑各底重輕之適實承慈實以寵嘉師咨爾恭蒸咸諭朕意

哲宗山陵祔廟畢德音兩京河陽鄭州管内元符三年九月丁卯

門下朕欽崇先猷寅奉大事園宅兆之吉卒定山園攷班祔之文既
躋廟祐維官師供億之衆丁壯追胥之勤霖潦頻仍賦調煩數人亦
勞止朕甚憫焉宜覃在宥之恩且優蠲復之惠應兩京畿內河陽鄭
州管内云云於戲慎終致敬下以風於多方恤臨施仁斯少休於近
甸咨爾衆庶體予至懷

欽聖山陵祔廟畢德音兩京畿內河陽鄭州管内建中靖國元年五月

二十
八日

門下朕紹休先烈邁恤東朝痛隔慈顏寅遵儉訓寢園宅吉永懷復
土之悲廟室薦嘉甫畢寧神之禮天時助順官師協心以克有終不
愆于素尚念災歎之候肆多供億之勞爰頒渙恩用周近甸兩京河
陽鄭州管内云云於戲送終致孝既盡事親之心宥罪推仁宜覃及

物之惠咨爾有衆底體至懷

欽成皇后園陵畢德音西京畿內河陽鄭州管內崇寧元年六月壬辰

門下朕厚奉欽成送終西洛追崇禮典肆嚴飭於寢園燕寧靈心甫
濟升於廟祐神祇助順上下協恭方時蘊隆乃克幹濟雖已終於大
事尤加惻於黎元尚慮繇役暴興供億匪易宜推渙渥以及近畿應
兩京畿內河陽鄭州管內云云於戲視民如傷常軫撫綏之念配天
其澤用覃矜宥之仁咨爾底民咸體朕意

惠恭園陵祔廟畢曲赦兩京河陽鄭州德音大觀三年正月十四日

門下殿閣長秋帳光塵之愈遠兆陪永裕屬園寢之既安甫旋重翟
之容初祔闕宮之恤眷言近甸良亦勞人雖費出縣官豈無調發之
擾而時當冬令諒多駁瘳之傷宜推在宥之恩仍廣復除之惠以寬
民隱以慰后慈應兩京畿內云云於戲追遠送終致厚坤儀之禮滌

瑕赦過肆施解澤之仁咨爾羣倫體予德意

昭懷原陵祔廟兩京畿內河陽鄭州德音

政和三年六月十八日

門下朕欽承永泰之緒篤厚昭懷之終已畢寢園方告成於虞事乃
躋廟祐以歸祔於宗祧眷近輔之繕營加暑雨之煩潁調發或擾供
億既勞而工無愆期人畢出力載惟暴露之久軫于朕躬用揚渙汗
之恩慰彼黎庶應兩京畿內河陽鄭州管內云云於厥勤恤民隱無
敢忽小人之依顧誕天明以推廣好生之德

祖宗加謚一

四廟謚議

臣聞后王受命祖宗發祥尚禮以尊之奉先之道也靡不致誠清廟
追謚鴻名瑤空其墻垣倣像其宮室奉神泣止思孝齊如爰稽考於
前朝咸遵行於盛禮伏惟皇帝陛下應機御極惟德司元休氣榮光

祚長於天塹赤文丹字德兆於靈圖乘運膺期變家為國夫乾坤不能頓為寒暑寒暑漸為陽秋君后不能驟作基局基局存乎考妣恭惟皇高祖文安府君履行高潔懿德粹深宏闊英風遐鍾聖世惟克成之鴻烈自開始之長源謹案謚法道德博聞曰文聰明睿智曰獻請上尊謚曰文獻皇帝廟號禧祖陵曰欽陵恭惟皇曾祖中憲府君英秀虛元溫明惠哲詒謀錫善奕世重光傳積聖以無窮實先幾而有兆謹案謚法柔質慈民曰惠主義行德曰元請上尊謚曰惠元皇帝廟號順祖陵曰康陵恭惟皇祖驍騎府君冲素無滄光謙是尚樹基立本緯義經仁合赤詔之居尊自黃裳之元吉謹案謚法平易不疵曰簡正德美容曰恭請上尊謚曰簡恭皇帝廟號翼祖陵號定陵恭惟聖考太尉府君明允篤誠肅恭純懿武金七德排大敵而立豐功善降百祥保太和而御遐福美談同於萬口休詠播於八音焜燿

耿光權輿丕命謹業謚法明德有功曰昭折衝禦侮曰武請上尊謚
曰昭武皇帝廟號宣祖陵號安陵又案謚法行見中外曰懿容儀恭
美曰明布德執義曰穆皇高祖妣崔氏請上尊謚曰文懿皇后皇曾
祖妣桑氏請上尊謚曰惠明皇后皇祖妣京兆郡太夫人劉氏請上
尊謚曰簡穆皇后伏以謚也者行之丹青號也者言之表著菲誠無
以彰其迹非號無以辨其名是以開創之君追崇其禮增敷前烈恢
闡令猷俾徽音永流異世彌振以對天地以虔宗祧師師在位之庶
官曷異式瞻於盛典制曰恭依典禮

太祖太宗加謚

詔
大中祥符元年六月庚寅

肆予寡昧獲奉宗祧恭膺累洽之祥沆致小康之治乾文昭錫瑞命
存臻仰承孚佑之仁尚賴詒謀之慶追於興誦將議封中蓋以答三
靈之眷懷奉二聖之登配潔粢致享用導於恭思勒石垂鴻式昭於

前烈戒期有素講禮惟寅且念建號施名蓋率道於典故奉先尊祖
宜罄盡於追崇考於舊史之文乃存加謚之制即當講求茂實蹈詠
鴻徽備物典章祇薦於寢廟侑神宗祀對越於高明庶盡冲人之心
昭報昊天之德太祖英武聖文神德皇帝太宗神功聖德文武皇帝
宜令所司定加尊謚俟封禪禮畢擇日恭上寶冊

今王旦撰太祖太宗謚議詔

大中祥符元年七月丙寅

朕以昭答元符將舉陟封之典誕揚茂烈載嚴升侑之儀誠篤奉先
志期歸美冀追崇於顯號用丕耀於方來特命元台戶部重事庶盡
虔恭之意聿昭嚴奉之誠太祖皇帝太宗皇帝謚議宜令工部尚書
平章事王旦撰

太祖加謚議

大中祥符元年八月一日

恭以追遠之誠爰伸大孝尊親之道斯謂鴻猷昭升屬以建創丕顯

期於歸美節其壹惠惟懿規而是崇法乎二儀取強名而斯在用彰
茂實以導永懷伏惟太祖英武聖文神德皇帝授瑞聖之符縉神武
之略兆民欣戴羣后駿奔顯龍顏日角之奇無黃鉞白旄之罰大勲
克集神器有歸列郡承風苛政斯革四方竊號汗俗尚存於是興節
制之兵遣折衝之將弔民伐罪勢若風霆代虐以寬惠如時雨與民
休息務畜於先疇異類懷來委質於重譯誕敷聲教震疊豈靈得猛
士以守方式清收圉擇循良而共治俾撫黎苗威振殊鄰化孚品彙
增修人紀丕變時風聖謨汪洋動探於理本帝德廣運高出於古先
復萬國之忠淳蕩累朝之澆季省官而修衆職法度著明節用而養
羣生黎元滋殖憂勞動於庶政恭儉過於百王振經國之宏規啓卜
年之鴻緒王猷煥於方冊德澤浸於齊民焦思勞身同文命之底績
雄才大略啓天漢之美名藩哲紹興丕圖累洽釀化溥博庶工緝熙

大詔厥之謀布惟新之命民躋仁壽之域更載符瑞之富丕應昭格
羣議余同傾頌美之誠獻登封之奏屢形謙拒難奪於臣誠乃示帝
俞式咨於典故仍從諭旨固避告成上報洪休奉揚先烈象功昭德
庶禮樂以交脩紀禪勒封詠祖考之來格嚴配之儀具舉孝思之念
滋深發自震裏誕垂詔旨慰霜露之感無大易名委廊廟之臣式重
其事表堯舜之行順天地之功寅奉靡違發明何及博詢清議載考
前聞且啓運膺圖造邦立極火德滋盛乾綱以正厯鴻錫祚立丕丕
之功純至固心有烝烝之孝合是具美益其大名伏請加上尊諡曰
啓運立極英武聖文神德元功火孝皇帝

宋朝大詔令集卷第一百四十

典禮二十五

祖宗加謚二

太宗加謚議

大中祥符元年

恭以錫美儲祉啓無疆之休孺慕增懷申罔極之報矧從興頌方屬
慶成封禪盛儀式揚於景鑠典章備物恭上於尊名表讓德之至虔
慰因心之永感伏惟太宗神功聖德文武皇帝撫同文之運鍾上聖
之姿初創寶圖肇膺駿命佑我烈祖登大寶之尊首進昌言下先庚
之令京邑安謐寰海底率允符漢后之心已著動天之德為宗社之
鎮早洽於謳謠以天日之表自當於展數躬承嘉命式恢大業鷁靡
之國獻地負固之邦泥首霜露所墜文軌攸同黎庶有懷孟之安樂
躬走占風之貢俗用丕變時臻大和軒后治兵神武之功定帝堯稽

古文思之化行由是廣興校之司增厚塾之制待賢良以不次班恩
度以惟明咸秩無文允釐庶政革尚貪之弊布在寬之教需勤恤之
惠式洽民和盡哀矜之情幾至刑措長揚罷獵靈臺偃伯示慈而好
生也卑宮菲食黃收純衣節用而昭儉也日吳聽理而忘倦乙夜觀
書而為樂窮神知化將聖多能胞合淵宗高視治古盡哲王之能事
煥帝者之大猷詠歎聲詩汪洋汗簡威神燁赫瞻雲馭以在天福祉
靈長延龜圖於卜世早留成範爰抑升中條制具存講求斯備遺功
有待垂裕無窮屬在欽明深惟纂服廣鴻猷而善繼敷至道以丕承
脩德錫符荐膺純嘏之貺展采錯事咸上登封之書瑞命下臨物情
上迫勉思從欲仍示好譙匪自告於豐功止奉承於先志茂對宵昊
答孚佑之仁肅奉神宗展昭配之典尚形至性垂詔宰司極歸美之
誠追崇斯至副顯親之重擬議何偕祖述唐虞範圍後載載脩節惠

之文爰採至公之論且惠綏仁育道洽化醇則太極之二儀奉混元之三寶皇明被於八表燭幽無松孝德邁於百王化民辟厚薦茲顯號以永英聲伏請加上尊謚曰至仁應道神功聖德文武夫明廣孝皇帝

太祖加號冊

大中祥符元年十一月二十七日

孝子嗣皇帝臣某謹再拜稽首上言臣聞長發其祥流芳於商頌克昌厥後播美於周詩慶以積善而綿長祖以有功而不顯純熙之祉罔爽無疆由資始於景靈爰錫美於來裔追崇盛典仰屬洪猷伏惟太祖英武聖文神德皇帝奮武開階膺圖邁象神機天縱睿斷馳驅自五代荒屯四方剖裂號令兢出文告靡賓興運有開正塗斯廓靈旗直指華路親征多壘湯平中區俾乂削去流孽斷除苛虐敦紹農業欽慎刑書憲度章明禮樂脩舉偃五兵而不用謹百職以咸宜

建皇極以敘倫振長策以御遠民用丕變時臻大同遠烈其存信書
攸紀臣猥以冲眇遠茲纂承履大寶之尊奉神器之重寤寐思治旰
晷忘勞勲循燕翼之謀克致治乎之化兵鋒載戢年穀順成琛寶來
庭邊防罷警仰昊穹之數佑繫宗社之儲休景貺荐臻寶符申錫將
行昭報祇事禋燔而臣庶相趨表章狎至願遵時邁固請升中勉徇
輿情用成先志上封喬岳既畢於遵高歸格太宮敢忘於尊祖粵若
應期之康濟創業之艱難底績之基局歸厚之風化垂于不朽可得
而言欽奉威靈重揚懿號謹遣攝太尉工部尚書平章事王旦奉冊
寶謹加上尊謚曰太祖啟運立極英武聖文神德元功大孝皇帝在
天降鑒錫祚有孚眷祐後昆永永無極

太宗加號冊

孝子嗣皇帝臣某謹再拜稽首言臣聞膺期受命聖人所以致太平

卜世其昌上帝所以祚明德然則升中昭事既報本於國方順美歸
尊當增崇於簡冊伏惟烈考太宗神功聖德文武皇帝丕功不宰妙
用無方若唐堯之聖神有周公之材藝在朱邸也垂象集連珠之慶
紹寶曆也長江出瑞石之文閩越來同并汾蓋定若乃得人而致治
用文以立教經武以定功信賞而慎罰講三王之禮備六代之樂攻
肆類以享帝尊一祖以配天百靈效祥九譯來貢和氣充塞德澤涵
濡然猶昨食勵精實行躬儉除宮室之藻飾絕弋獵之嬉遊聖省耆
稱抑罷封禪積德深厚垂慶綿長臣薄躬誕膺丕錫守位一紀率
土咸懷疊委祥符屢惟稔歲徇黎庶之虔請循虞夏之舊章告成介
邱昭紀大號奉揚前烈傳之無窮而陟配方嚴鴻名未稱敢不周爰
古道作揣大猷上以協靈祇之心下以伸臣子之志再章節惠永播
英聲謹遣攝太尉工部尚書平章事王旦奉冊寶加上尊謚曰太宗

至仁應道神功聖德文武大明唐孝皇帝恭惟至神俯歆令典延休
萬葉介福兆人

六朝加謚二字制

大中祥符五年閏十月乙亥

猥以眇質獲紹寶圖緬念聿脩居懷若厲比者躬延真馭啓迪帝先
孚佑黎元積封功於上古保綏宗祏垂鴻慶於後昆錫美聿昭感慰
交集是敢揚祖宗之丕烈增典冊之徽稱茂展孝思用光燕翼太廟
六室各奉上尊謚二字擇日備禮奉冊

禧祖加謚冊文

天禧元年正月己酉

臣聞肇基王迹實自於上仁貽厥孫謀仰繫於至德矧茂克昌之烈
誕彰錫羨之靈佑寶緒之重熙感光遊之來格用展道追之禮式昭
駿惠之風伏惟僖祖文獻皇帝潛隱韜明廣淵藏用稟元氣而毓粹
積純嘏以沅輝陟降自天始恢於成命儀刑後裔大集於繁禧臣猥

以眇冲獲膺嗣服奉宗祧之重惟懷永圖卹萬縣之勞敢忘丕則祇
受貽訓馴致太平屬裡瘥之交脩荷穹昊之報降真期允協颺馭載
臨諭長發之遐源申率懷之名福監觀攸接先謂於凝祥罔爽有開
寶資於累洽謹奉玉冊玉寶加工尊謚曰僖祖文獻睿和皇帝道隆
觀德孝極因心方期對越之靈適指麾鴻之祐時億時萬永矣無疆

順祖加謚冊文

伏以無疆之緒自積累以承基祇適之心仰開先而尊祖孝之大者
禮其拾諸故列辟之所先曩籍之攸尚恭惟順祖惠元皇帝諸精剛
捷稟氣中和守素知常含輝德耀冲襟然而自運盛德晦而彌章笙
鏞之音將從於丕變龍蛇之蟄因蘊於多奇惠流千乘之邦道冠六
藝之國創業垂裕仰藉於慶靈資始守成緬懷於燕翼宜乎隆會昌
之帝祉受丕顯之尊名粵以渺姿紹膺元祚荷貽謀於接統成至治

於丕平鉅則交脩真游狎降邦家襲吉先戴於發祥禮典考言敢忘
於追遠稽合古訓濬發皇猷謹奉玉冊玉寶加上尊謚曰順祖惠元
睿明皇帝伏惟威神下濟福祿荐臻克敷洪鑒永保後昆

翼祖加謚冊文

恭以肇基皇統實本於累仁祇適孫謀克昌於永商屬交脩於鉅禮
復進昭於僊宗稽靈命以致虔方仲昭事述鴻微而昭孝敢竭精忠
伏惟翼祖簡恭皇帝宅粹洪源澄神妙鍵茂岐幽之至德啟姚姁之
丕圖道協惟幾功歸不宰發祥垂世飛玉錄之名屈已濟人踐朱轡
之任開階列聖錫祚眇躬削五代之荒屯契三神之幽贊武臻銷僭
文洽化成靈躬承風混同而無外昆岐浸澤衍益而咸懷觀應馭之
格思荷璿穹之眷佑紹靈長之業獲對真期奉尊極之稱式隆美報
永惟觀德斯用薦誠仰止太宮備茲繹典外盡物而內盡志冀達明

馨由大德而受大名益揚顯懿謹奉玉冊玉寶加上尊謚曰翼祖簡
恭睿德皇帝羣后在列六樂是陳祇若嚴祀載刻溫珉令問不已禔
福惟新

宣祖加謚冊文

臣聞天序丕承運膺於續服祖功錫美禮重於歸尊純嘏鋪昭靈期
以之協應徽名升薦慶典以之宣明伏惟宣祖昭武皇帝醇粹在躬
幾神周物總戎昭以致用殖德基而惡厚勤王懋績佑武中威道濟
乎三才慶垂乎千億赤符啟祚黃圖宅中萬寓來同二聖善繼齊詠
絲綖增茂於本支濬發深源誕流乎重潤肆臣京師獲紹宗祐邊鄙
不聳神人以和勒崇仙閣奉祇汾曲曠絕交舉聲文寢盛偉兆彰戒
飛軒降鑒怡聞聖系禽受禔福景命屬率由燕翼之謀懷榮號講求
丕昭積累之業惟睿洞乎奧蹟齊聖兼乎哲明懿鑠誕敷休烈惟大

謹奉玉冊玉寶加上尊諡曰宣祖昭武睿聖皇帝冀紆冲鑒膺受丕
稱馨咳如聞敷佑無極

太祖加謚冊文

臣聞闢大統者功侔於蒼昊建皇極者德被於黎元膺麻數以在躬
固天人之合契若乃廓九圍而底定恢億載以熙隆長發其祥詒謀
於永世有秩斯祐儲慶於後昆禮莫大於易名孝莫先於追遠率循
令範丕顯鴻猷伏惟太祖啟運立極英武聖文神德元功大孝皇帝
凝命有孚惟睿作聖奮成湯烈烈之武布周文赫赫之明天授寶圖
運興淳耀登闕大業震疊皇稜總八極以居尊乘六龍而行健削平
多壘康靖羣生混一車書教寧區夏稽三古之憲度章五代之荒屯
至化醇流英聲載路乘無疆之茂烈固累盛之鴻基臣猥以眇躬欽
承聖緒獲鍾亨會允洽純休抵受元符誕昭靈貺繇是升中喬嶽報

本隆雖既盛則以章明仰僊遊之臨暨侍辟容於咫尺天間景命於希
微斯蓋穹厚之降祥宗祐之垂祐惟真祖之德爰奉尊稱而列聖之
靈載崇丕號予以述宣景鏤對越威神稽節惠之文導永懷之感謹
奉玉冊玉寶加上尊諡曰太祖啟運立極英武睿文神德聖功至明
大孝皇帝恭惟昭升盛禮允鑒至誠誕慶徽章永隆純嘏

太宗加諡冊文

臣聞有開之福中錫無疆允文之功克昌厥後矧惟丕烈降誕景靈
對越皇天茂昭于道蔭肆于累葉克集於神休仰膺妙用之仁敢怠
顯承之志伏惟太宗至仁應道神功聖德文武大明廣孝皇帝二儀
宅粹五緯儲精德宇淵明威靈震疊黎民於彛播陶唐惟大之功五
典克從秉虞舜慎徽之道惠和宣決英武漢揚拯汾晉之民重陽底
定納吳越之款天下同文爰偃節以建橐每臨軒而旰食綴學立制

儀式於典章類帝禮宗發揮於禮樂登庸亮直體象清明報降有融
尚抑封崇之事儀刑是式誕彰通駿之聲宣哲詒謀積仁垂慶俾臣
冲眇獲奉宗祧仰承燕翼之私日勵躬勤之志紹休景貺保集太和
四氣凝祥嘉生茂育百工獻頌必祀交脩荷上帝之鑒觀感高真之
昭格昨儀欽飢諄誨親聞諭寶胄之厯鴻悟洪基之邈遠廣敷純錫
遐被嘉生載惟永世之祥實賴在天之慶方嚴陟配合薦鴻名茂宣
錫美之祥用極寅威之志謹奉玉冊玉寶加上尊諡曰太宗至仁應
道神功聖德文武睿烈大明廣孝皇帝恭惟神超物表化炳幾先混
六合而一統恢大寶於億年踰繩越契降地蟠天仰妙道之行矣寶
無象以名焉增崇聖緒永祚仙源

真宗加諡詔

天聖二年八月

先帝臨御八紘憂勞萬務西巡河朔親御戎師以櫛風沐雨之勤成

展義省方之事繇是殊鄰修好中夏偃戈西裔稱藩三邊絕警蒸民
老幼得全其生二十年間最為隆盛而於謚號之內略其威武之稱
中外之人咸有鬱差之論斯豈朕所以奉揚先烈之意始於前歲嘗
議增加屬奉山陵因而稽緩今者類經脩及孝饗方伸矧祖宗之舊
規常再加於徽冊爰昭美稱式播無窮宜於先帝謚號內加二字依
先朝再二祖宗謚號故事施行仍令兩制與太常禮院同詳定以聞

真宗加謚議

恭以真宗皇帝躬文明之資秉神武之略兩河之狩申大信於殊鄰
喬嶽之封格元功於靈贍於是偃戈而清三塞奠枕而臨四方名高
百王無與比盛謹案謚法克定禍亂曰武威強睿德曰武大慮慈氏
曰定安民法故曰定王者統天育民表德建謚傳於冊府貽厥來世
所以奉彝制而揚徽烈也伏請加上謚曰文明武定章聖元孝皇帝

詔恭依

章穆皇后改謚冊文

維慶祿四年歲次甲申十一月戊午朔二十二日乙卯孝子嗣臣某
伏以尊母儀者功歸于聖淑配宸極者體同於稱謂稽夫漢有光烈
唐有文德所以著大法示來葉也若乃飾鴻徽揚景鑠古今通誼也
恭以皇妣莊穆皇后郭氏河汾甲族姜任令猷總治長秋正位坤掖
輔佐聖考述宣陰教謙肅以居體慈懿以流譽靡臻曼壽永貽茂範
升祔清廟垂裕彤管夫以宗祊之重有司定論僉以託母天下體無
攸違式遵先典仰圖懿實追王禮謚之失稽合禰宮之號順公議之
協濟正徽名而允穆上以廣思齊之美下以伸適追之孝謹遣攝太
尉推忠協謀同德守正佐理功臣特進行工部尚書同中書門下平
章事兼樞密使昭文館大學士監修國史兼譯經潤文史上柱國京

光郡開國公食邑七千五百戶食實封貳千肆百戶章得象奉玉冊
玉寶改上尊諡曰章穆皇后伏惟昭格明靈具膺典冊祐蕃昌之緒
流顯懿之聲協宣景耀摠之罔極謹言

章獻明肅皇太后改

孝子嗣皇帝臣某伏以奉宗祧遵聖緒莫重于顯親正坤極母天下
匪專于殊號嘗講求因革參稽遺隆昔藝祖在御易昭憲之稱惟禮
所以接情惟名所以配德垂鴻萬葉敢不詳正恭以莊獻明肅皇太
后覩天稟靈曾沙膺慶輔佐文考正位內朝關雎之德賢才是進濯
龍之誠外戚咸勸顧惟菲質夙荷慈蔭保佑丕構億寧中夏長樂之
駐椒聲無已今客塋定論援據有經謂東漢諸后法同帝諡宜以章
聖稱天之誅冠夫德號茲臣工之所盡志典冊之所正名著之方來
不可闕也謹遣攝太尉推忠協謀佐理功臣金紫光祿大夫行尚書

吏部侍郎同中書門下平章事兼樞密使集賢殿大學士上柱國京兆郡開國公食邑二千八百戶食實封捌百戶杜衍奉玉冊玉寶改上尊謚曰章獻明肅皇太后伏惟徽音無極靈鑒聿昭顯受丕構幽贊鴻社子孫十億垂休無疆謹言

莊懿皇太后改謚冊文

維慶厯四年歲次甲申十一月戊午朔二十二日己卯孝子嗣皇帝臣某恭聞母統父尊生民之大訓后緣帝謚前辟之成法曩在乾德秩正彝倫易題昭主協配宣室國著丕範疇敢不承恭以莊懿皇太后稟順坤極憑華日體於赫歲歲寶誕眎躬雖託帝武之歆早違天下之養向者遵舊制易崇名鏤于玉牒藏于金匱比咨公議頗謂夫傳亟下攸司事得詳慶咸曰中以無遂為美禮以有從為隆若引文考之惠冠長樂之號得體之正厭神之衷臣稽求典常參訂宜稱上

不敢不循太祖之烈下不敢不繫真宗之義以章易莊信示來葉謹
遣攝太尉推忠協謀佐理功臣金紫光祿大夫行尚書吏部侍郎同
中書門下平章事兼樞密使集賢殿大學士上柱國京兆郡開國公
食邑二千八百戶食實封捌百戶杜衍奉玉冊玉寶政上尊謚曰章
懿皇太后伏惟孝厥靈鑒膺是徽章據柔德以大受奮內則之幽光
垂憲億年與祚無疆謹言

宋朝大詔令集卷第一百四十一

典禮二十六

祖宗加謚三

章懷皇后改謚冊文

孝子嗣皇帝臣某伏聞周稱文母漢著光烈繫王之號與廟俱傳雅
忠質迹變詳簡殊尚至於奉先統尊母極其誼一也恭以莊懷皇后
挺倪天之稟率流衍之恭作僊儲禁收華早世逮即丕祚迄位長秋
時推內範之懿厥有大名之受真宗升道天諸垂鴻攸司持循偶失
參考今議者援述祖則執據舊章以謂后無外事法不尊謚況春秋
之善大乎復古聖哲之訓必也正名禮雖沒美神弗安饗敢以帝易
莊申告典冊奉承聖孝順迪母儀謹遣攝太尉推忠協謀佐理功臣
樞密使金紫光祿大夫檢校太傅行尚書工部侍郎上柱國河內郡

開國侯食邑一千戶食實封貳百戶賈昌朝奉玉冊玉寶改上尊諡
曰章懷皇后伏惟光靈有在監謨孔昭捨可改之權制安不遷之永
憲錫類昌後以摠無窮謹言

章惠皇太后改謚冊文

孝子嗣皇帝臣某恭聞先帝時懷穆穆后早世上仙崇告天謚用題
廟主有為而作未從定制明肅厥務容臺諫功因仍前比遂朕懿號
弗繫於真聖不可謂順有異於祖法不可謂宜惕然深念思從追正
恭以莊惠皇太后端靜淵柔仁明厚博輔佐聖考知臣下之勞撫衛
眇質均母氏之愛向緣闕祐已易大名不常神心未協禮意是以採
攸司之執奏稽中古之成憲統尊則有典據舊則易遵間詒公議弗
謀而協謹遣攝太尉推忠協謀佐理功臣金紫光祿大夫尚書吏部
侍郎同中書門下平章事兼樞密使集賢殿大學士上柱國京兆郡

開國公食邑三千八百戶食實封捌百戶杜衍奉玉冊玉寶改上尊
謚曰章惠皇太后伏惟慈烈如在容物是膺捨曾誤之華謂指永孚
之淑聲子子孫孫式克欽承謹言

今兩制太常禮院詳定增真宗謚詔慶曆七年十月辛巳

先皇帝繼聖御圖右文敷化睦鄰講好封岱告成二紀之間三代可
復載惟謚號之冊未殫善美之文夙夜匪遑人神缺望屬筆脩於九
祀宜加上於徽名傳之無窮庶申永慕將來南郊宜增真宗皇帝尊
謚如先期再上祖宗謚號之儀其令兩制太常禮院詳定以聞

真宗增謚奏慶曆七年八月丙辰

恭以先帝奄宅八區逮將二紀文經緯乎天地武震耀乎戎夷西土
懷德以稱藩朔漢畏威而講好於是包干戈於武庫息烽燧於邊亭
含氣之倫極乎休養戴白之老不見天旌乃登岱宗而薦成禪云亭

而繼號汾睢分美報之典渦曲舉順動之行協氣旁流象物昭格禮
交樂舉成秩於彌文乾符坤珍存蒙於上瑞高拱而覃清淨之教淵
嘿而臻治定之風可謂昭受珍圖而順考古道元功克成而盛德能
讓者矣臣等伏思陛下以先帝之丕繇未極美稱上配祖考猶有闕
然廼降明詔發德音追崇景光揚于麤億臣等得以奉承之伏請加
上謚號曰膺符稽古成功讓德文明武定章聖元孝皇帝詔恭依
仁宗加徽號體天法道極功全德濟哲明孝皇帝議元豐六年閏六

子月庚

臣等聞名者實之昭也寶著則名美號者功之表也功啟財號隆此
自然之符不易之道也故自昔睿哲之君臨制四海其道至於配神
明享天地其德至於澤萬物和天下治侔往初功無與二然生必膺
大名終必崇徽號而後能揚對天之烈昭無窮之聞固先賡而不昌

疇或違而能存夫冠德卓絕者莫崇乎二帝收功萬世者莫隆於三
王稽其所行率由茲道故典謨之所紀盤誥之所載生商長發之所
歸美清廟執競之所詠歌赫乎如日月震乎如雷霆傳之子孫與天
無極惟宋有天下以聖繼聖以神繼神益未嘗易此也恭惟仁宗皇
帝躬上聖之質宅丕平之期有聰明睿知之才有徽柔懿恭之德粵
自握乾符闡坤珎則儲思於極治垂監於太清馳仁聖之極擊跽帝
王之登閔若夫知落天池而不自慮辯周萬物而不自悅虛己以延
俊乂之策和顏以徠直諫之諫拂心忤耳罔不并容此乃虞舜之察
通言也況愛黎庶惟刑之恤建明察以官之擇慈惠以長之文疑者
請讞罪疑者予民用法誤入斥而不獲故微文巧詆之俗易勝殲去
殺之化成此乃帝堯之哀庶幾也履三聖之重熙秉四海之既富實
與地侔廣賦興山比崇而克已循禮以先天下斥侈靡示太素此乃

文王之卑服即功也昭事上帝小心翼翼雨暘之不時天異之或見
未嘗不潔誠齋戒側身修行以答塞谷應導迎福祉此乃高宗之寅
畏夫命也玉几聽斷至于日中黼惟訪覽迄于夜久擘權綱核名實
欲吏之瘥也明賞信罰以勸沮之欲民之裕也簡政敷惠以撫循之
天宇之下涵養理極薰以太和灑以時雨凡其所欲不謁而獲凡其
所惡不祈而息戴白之老不識兵革澤浸而益深仁翔而益溥迨夫
乘久安之期閔積累之敝則奮然進用大臣收歛豪俊欲變更夫下
之治以進復三代之隆數開延閣以訪其先務又降宸翰以督其施
為羣臣承命震懾奔走發德音下明詔興學校勸農桑修廢官舉逸
民破拘孥之例以薦進人材革因循之法以旌別能否節用度而先
之宮禁制財賦而歸之有司減任子之數設守宰之課于時四方拭目
以觀太平績熙之蹟過乎於穆盛德之頌續於猗那躬籍以率天

下之耕耨祭以教天下之孝八見邦祀而拜況肇裡之禮成再祀明
堂而嚴父報本之志盡收遺俊理秘文以潤色鴻業定雅樂均鈞石
以逆釐三神合大宗於外郎而惇睦辯章之化洽錫諸將以新書而
攻守應敵之略具陟配三后並假二廟隆孝至也親屈車駕臨幸太
學崇儒術也制定九經罷黜百家揭正道也奮辭摘藻昭回雲漢明
聖作也廢放鄭聲屏棄田獵抑損燕私以勞天下尊德性也秘殿之
下錦几之上論經居前勸誦在後道問學也其禦我也迫而後應其
治兵也動而必勝故靈旗西伐而玉關請盟天戈南麾而允渠就戮
揚威絕域之表勦功朱垠之野雖詩之雷霆易之折首不能過也至
於決大策建大本來嘗不圖萬世之安符四海之望稽天從人援立
聖子而社稷以安九有以寧雖禹之知啓文之立武不能踰也故四
十二年表裏禔福紀綱完密易治也法度昭明易則也英才鱗集易

用也軌述平夷易循也德澤之流川衍海沛旁魄四塞沾濡行著蒙
被馬牛符瑞之衆泉涌山出間見層布編於史牒詠於歌樂莊周曰
美成在久信乎其久也孔子曰必世後仁信乎其仁也覲之前聖考
之近古盖未有殊尤絕迹善始善終如此其盛夫澤被天下民莫能
名非體天乎為而不恃應而不藏非法道乎兵寢不試刑錯不式非
極功乎六通四闢兼濟萬物非全德乎制作禮樂燔極天地非神文
乎不怒而威不殺而服非聖武乎占天與子以嗣大庥非濬哲乎旁
燭無疆萬物並照非至明乎慈德愛親刑于四海非至孝乎卓子照
爛真神明之表也備道全美孰能兼此伏請上徽號曰仁宗體天法
道極功全德神文聖武濬哲明孝皇帝

仁宗加上體天法道極功全德神文聖武濬哲明孝皇帝冊

維元豐六年歲次癸亥十一月壬寅朔二日癸卯孝孫嗣皇帝臣某
謹再拜稽首言曰臣伏觀古先格王莫不大名發於前而大惠昭於
後其法皆本於至公而不可易至後世臣子又欲盡報上之道以謂
君德甚盛其言不足以包衆美於是有至郊加諫之文夫欲推事存
之禮述追遠之志則奉素享之榮號蓋新紀之鴻烈謀羣公請太室
洋洋庠際天接地而震顚之不亦當靈心而傳古誼乎恭惟仁宗神
文聖武明孝皇帝躬清明之資賦神睿之略乾行施之不息仁性根
於自然時乘六龍端御大器知窮入荒而不見其迹澤及萬彙而不
居其功爾乃簡拔峻賢放遠邪佞宥恕刑獄懷保鰥寡賞不偏所私
罰必當於理興農桑之本務緝禮樂之墜史有慘怛好生之心吏或
誤入重辟必終身見斥有寬裕從諫之廢言者屢進狂直必曲意見
容念兵革之傷民則不戢而服念稼穡之勤勞則罔寧于逸矧復天

下之尊而特之以抑畏饗天下之富而寶之以儉素興馬不聞于遊
盤鍾鼓不陟於閭燕宮室無奢靡之飾器服亡環奇之玩加以夙夜
齊栗事天之誠盡霜露怵惕念親之感深方朝廷之久安延大韋因
循而聖政又新為社稷之重討延前定禍亂而皇嗣早立故四十二
年仁恩川流渙濡薰蒸格於上下日月華風雨均四時蘇百穀蕃北
有彊敵而不能驕西有點卷而不能軼燕魚遂性自安川數之遊男
女潔成更趁耕織之樂固有幽遐荒昧之俗不約而子來奇偉個儻
之瑞不期而特見者矣丕赫哉憲度鴻明聲文沛施自載籍之傳蓋
未有休功盛業可加于茲也重循涼菲永念猷訓今將歆清廟陟紫
壇遂受厚福以浸黎元宜於此時臨彤庭發玉版上不敢墮祖宗之
典下不敢忽神民之情如堯如舜如雨如湯豈不高一世之閒而流
萬世之聲哉爰飭上儀載揚景鑠謹遣銀青光祿大夫尚書左僕射

兼門下侍郎上柱國太原郡開國公食邑七千六百戶食實封二千五百戶王珪奉玉冊玉寶加上徽號曰仁宗體天法道極功全德神文聖武睿哲明孝皇帝恭惟明德在天臨受徽稱維億萬年永錫皇祉謹言

英宗加上徽號體乾膺祿隆功盛德憲文肅武睿神宣孝皇

帝議

元豐元年五月二十五日

臣等間運行無窮橐籥萬物而其迹不可見者天也微妙不測化育萬類而其功不可名者帝也天之迹雖不可見然言其氣則謂之昊言其仁則謂之昊帝之功雖不可名然稱其化則謂之聖稱其妙則謂之神亦道其可見與其可名者而已矣故自五福初起以還聰明睿知之主莫不察天人之眷與歌詠之心紀祖宗殊尤卓偉之烈崇徽號備典冊以協大公之議以稱褒揚之誠炳之四方傳之後世豈

不盛歟恭惟英宗皇帝受命穆消履道淵懿秉乾之剛健體離之文明粵自潛隱宗藩出就庠序其神靈之德粹美之行已類然自見於宗室之表篤於學問待旦不寐究道德之高明原仁義之歸趣察古今之變異蹈聖賢之中庸斯弓高宗之學于河洲所不能方也故養正聖功裕然自得於穆今問廣莫不聞警天應龍之將飛也必文采著見而後能撒膠葛騰九閼大明之將升也必光氣前發而後能掀氛翳燭六合此神明之祚自然之符也仁宗皇帝深見天命燭知至隱斷之聖心授之宗器而謙畏自守弗即承詔有予槐不嗣淵穆之對有確乎不拔中正之操逮乎越歲踰時乃始遷思回慮以表相邦家贊揚睿哲斯乃漢文之遜代邸所不能偕也及夫膺當天之明命秉炎上之興運則抗意於閑眇儲思於泰寧念昭考之託也則達三年之戚而不改其道念文母之慈也則極四海之養而能竭其誠拜

況園邱則刺六經綴禮樂而肅祗享神之禮備登保清廟則令諸侯
諧金石而顯相多士之德洽決萬微之務也踰於日異攬四方之奏
也至於夜艾其於政也與同利而除同害其於民也與所欲而捐所
惡發粟以振窮乏抑末以勸農桑惠吏之寬則濟之以嚴惠俗之薄
則矯之以厚施不次之賞用不測之罰明忠信以示之振綱律以維
之勵冥冥之志成昭昭之明秉翼翼之心就赫赫之蹟體貌大臣賓
禮故老悅色以開謀爭前席以待雋乂敷下明詔敦求讜言至于日
臨經帷以延講議隆學也間開秘殿以詢讞納廣聽也置宗子之學
以隆蕃衛洪業也增冊府之員以育英才盛視也合兵於農而不牽
浮論明斷也拔材於隱而不間跡施善馭也糾合公族而斥棄禁禦
至仁也入繼大統而嚴於尊祖上德也躬定聖嗣以安天下光哲也
若大承富有之業而示之以敦朴宅丕平之期而莊之以勤儉絕卻

聲色之好屏去遊田之娛左右嬪嬙無耕風增成位號之授花園臺沼徵長揚屬玉觀覽之靡克已以化民力行以帥下左右齎栗懷金貂慕學之善貴戚循理杜濯龍車馬之僭四方承風百僚仰法況復宣藝祖之重光襲仁宗之遠畧信幣北指強敵畏恐以謹盟輔軒西馳黠羌震懾而請命不煩一戟不煩尺組而三垂晏然矣是以五年之間大勲允集寰海之內含生之倫莫不蒙被潤澤其效祥薦瑞應圖合牒者馴擾坰牧屬揭邦畿卓犖郡國洋溢要荒儻天開永命增錫壽愷則將度三王之軌躅歷五帝之登閔奮張德威斥大疆土揚旌北戶之野飲馬幽崖之水加乎日域含肅乎河源包上聖之所不征盡至仁之所不服爛然竹帛不可殫紀者也臣謹稽之前古考之行事察措紳之所傳究六藝之所趣夫剛健粹精不言所利非體乾乎繼天統極傳之無疆非膺麻乎丕承之烈盈塞天淵非隆功乎

輝光日新格于上下非盛德乎華藻照爛經緯乾坤非憲文乎四裔
震疊莫不來享非肅武乎窮理而通致一而明睿也鼓舞萬物民莫
能名神也昭明義聞不匿厥指宣也承顏安親悌序九族孝也盛哉
鏘乎真帝王之極致今昔之上儀足以焜耀四方歸美千載非澹然
無極衆美從之孰能與此伏請上徽號曰英宗體乾膺祿隆功盛德
憲文肅武睿神宣孝皇帝

神宗增謚十字詔

紹興二年三月丙申

朕恭惟先皇帝經德秉哲君臨萬邦十有九年若古之道措之政事
功烈之茂匹休三王而謚號所紀曾未足以究宣萬一朕嗣有大業
懼德不類無以光照前人蓋聖人之在天下也神化獨運民無能名
而盛德形容莫可擬象矧是追崇之禮固存列聖之規其率舊章甲
加徽稱用揚顯烈傳之無窮先帝謚號見今六字宜增上徽號十字

宋朝大詔令集卷一百四十一
如祖宗故事令三省樞密院官御史中丞雜學士以上同太常寺集
議仍令禮官詳具典禮以聞

宋朝大詔令集卷一百四十一

宋朝大詔令集卷第一百四十二

典禮二十七

祖宗加謚四

神宗加上徽號紹天法古運德建功英文烈武仁孝皇帝

二年五月

臣等聞功者德之緒名者實之賓時有殷虞故事有先後道有顯藏故言有徽章是故堯舜以帝而紹文武以王而興皆聖人也而書稱其德或謂之俊或謂之元清廟祀文而深妙眇冥以見文王之清執競祀武而宣著煒煜以揚武王之烈非期不同稱實而已歷選列辟揆其所成自周之衰道與世降秦漢隋唐之君見聞單狹其所講究不至三代以上天下之民不獲與被王澤之施者千有餘年矣我宋受命克享天心數哲相承與周同符恭惟神宗皇帝躬上聖卓然之

姿而輔之以光明緝熙之學深智妙用有開于天蓋自伏羲之所畫
黃帝之所名箕子之所陳仲尼之所緒徽辭與義意會心微而得其
所不言者故於立政造事稽之以為驗操之以為決動皆合於先王
而非俗學小道之所能察也自初紹服歷監前代法久而弊變而通
之非常之元異意交沮公聽並觀與神為謀信任同德率圖康功用
能拔舉一時之才盡飭難變之監本數末度無不畢陳文物聲明煥
乎可述加惠天下十有九年百姓蒙福四夷來賓此其功在天下而
章明較著者也若夫事親之盡其道睦族之致其恩修身之慎齊家
之飭從善之易臨政之勤事天之畏禮神之恭有後世欲治之主得
一以為賢者而身兼之篤行之士勉強以為難者而安行之可謂澹
然無極而衆美從之者也功大而不有名顯而不居發揚閔休實在
後嗣是以明詔以謂乃者謚號所紀未足以究宣萬一無以尊大詎

施無窮率循舊章增上徽稱臣等謹考諸行事質之先王盖先之以
合其幾後之以奉其時所以為紹天若之以經其常稽之以緯其變
所以為法古存諸內者天而神被諸外者動而化此德之所以運作
其大而小者述之立其本而末者從之此功之所以建據道之餘以
應物開物之禮以明民此之謂英文惟剛也故立而莫競惟神也故
威而不殺此之謂烈武不自以為足而尊所可尚之謂欽兼利天下
而已不與有之謂仁以道為門兆於變化之謂聖而終始於人道以
立天下之本者孝也合是衆德以為之各名以賓實實莫之可誣擬其
形容庶可概見伏請增上徽號曰神宗紹天法古運德建功英文烈
武欽仁聖孝皇帝

謚冊

孝子嗣皇帝臣某謹再拜稽首言臣聞帝莫盛於堯堯無能名也然頌

其德則曰乃神乃聖乃武乃文王莫賢於禹爲惟不代也然稱其美則曰克勤克儉成允成功夫聖人精神之運道德之妙天下雖欲稱之蓋非言辭之所能喻然而善積而譽來功顯而名立則位號之至亦有所不可得而辭嗚呼惟我聖考在省天下十有九年功德成就巍巍蕩蕩齊乎堯之難名深執謙冲屏却徽稱同乎禹之不伐澤流當時施及後世四方誦之萬世施之殫竹帛之載不足以敘述罄雅頌之奏不足以形容然而清廟宗德之稱臣子歸美之報積崇累鉅非止一再肆予小子竊稽大義其敢苟且恭惟神宗英文烈武聖孝皇帝挺黃帝之神靈而服虞舜之大孝兼成湯之勇智而勵文王之心心紹列聖無疆之休當百年承平之久弗恃其安弗有其治望古以有為愛日如不及閔自晚周以來王者之迹熄而言治者無復見古人之大體慨然以唐虞三代為可復願秦漢而下卑不足議臨御

之初即引名世之士講明六經之文得於言意之表黜諸儒拘牽之論革千載玩弊之習興造事業作新人才當是時也民懼非常士守固陋淫朋比德環視蠢起倡險膚之說以震驚於下合流俗之衆欲取必於上然而曲學不能撓禮義之正異意不能移委任之專闢正道於羣枉必爭之際拔孤忠於衆讒必毀之中屏黜衆謬而莫敢以沽激為異放遠憮倭而莫敢以希合為同雖頑狠教戾皆革面退聽天下曉然知德意悉慮之所在以身為度以指為決言必據經事以道揆探索其隱與發揮其精華默焉而天潛動焉而神會叙有典秩有禮章有德討有罪官正其名士典于學寓兵于農隸軍于將弛役以便農平估以抑末刑法今定律呂自熙寧之始迄于元豐之際文章制作樞機品式粲然而一新覆載之內有耳有目者莫不延頸企踵奔走承聽相與乎其德樂其成其是謂大有為之時曠世難逢之

會也嗚呼其道妙矣不可得而言矣所可言者緒餘土苴應帝王之迹而已迺者王公卿士逮蠻夷之長叩閭稽顙願上尊號者至於數十卒詔有司毋復以言及夫升祔太室有請于郊人謀天同錫茲定命然尚懼并包衆美未能髣髴十年于茲靡違夙夜爰卜季秋躬修宗祀而中外合辭祔適舊典方開明堂配上帝宜增紀徽名對越祖考赫然金聲揭之玉版猶之度量天地莫測其高厚模寫日月徒駭其光明姑述所知其以自竭於以彌古今之文申人神之願擬而象之垂世無極謹遣左正議大夫守尚書左樞射兼門下侍郎上柱國豫章郡開國公食邑四千四百戶食實封四千一百戶章惇奉玉冊玉寶加上徽號曰紹天法古運德建功英文烈武欽仁聖孝皇帝伏惟明德在天降鑒于下於昭受祉永綏厥後謹言

重定神宗徽號詔

崇寧三年三月二十八日勅門下朕惟神宗皇帝以道蒞天下而以政事治之若稽唐虞三代之隆垂格萬世無窮之統與天地造化相為始終其功德之盛豈言之一二所能該括哉奉上徽號循用舊章必假丕揚著於典冊紹聖之詔竭意追崇當時議臣講求弗盡夫帝德廣運非運德也巍巍乎其有功非建功也言既未安理亦隨失殆未足以仰慰在天之神靈而昭示於後哲宗皇帝屢欲更號未及終行肆予續承安敢輒止宜令三省樞密院官御史中丞雜學士太中大夫以上與太常寺同共集議典禮詳具以聞故茲詔示想宜知悉

謚議 崇寧三年七月二十三日

臣等聞天子之孝所以事宗廟者莫大於率顯衆志發揚宏休知歷世之君皆有徽稱著在典冊以詔無窮然名止於實必求其當揆之以理則協施之於言則順質之前聖而有合垂之後世而不惑然後

可以慰在天之神而成孝思之美若乃羣臣之議出於一時非不大也而理猶未稱非不盛也而言猶未安則雖嘗請於太室薦于神明亦將審義度情以時更定蓋事之大烏可已哉恭惟神宗皇帝以聰明睿智莫可企及之姿輔之以廣大悉備無所不通之學自初嗣服慨然遠觀當百年承平內外流弊之餘非大有為則不能飭萬事之盡憫秦漢而下卑陋狹促無足以論而久不興被先王之澤於是獨取堯舜二代之所為見於詩書者舉而行之至於性命之原道德之妙則又自得於心術之間而操以為驗稽以為決者悉本於聖人之訓故內則孝養於兩宮惇叙於九族外則登任同德信任不疑拔舉賢能咸以類進異意交沮不潰于成非常之元率無所懼於是立政造事百度一新尊經術以革取士之科明義訓以變俗學之弊募力役以除差擾之害時歛散以行補助之仁勸農桑阜貨賄嚴保伍均

賦祖修水土之官厚衣食之本以至立原廟以燕祖考別二郊以事神祇酌六典以正官名制九軍以飭戰法拔士於片言而拓河隴之境築城於遐徼而附壁荆之酋問罪于西夏而師不踰時通使于東人而仁不異遠德意所向為無不成方且黃長以奉天儉約以率下舒尊號而不受有大美而不居十有九年海內豐富民安其業物遂其性和氣充塞喜祥存臻自成周以來未有若茲之盛也雖然豈勞精神役思慮費脂糜務從事於末流也哉猶一氣運於造化之初萬物賦形各隨其分無不造其極者是謂體元體則體此而未始離也道藏於無形不可以為象無乎不在而無乎不為而神之所降明之所出皆見於有為之迹是謂顯道顯則顯此而未始散也得道以在我曲神以應物所同者二帝則總之曰帝德措於事業民以歸往所同者三王則總之曰王功而元者貫三才以為首道者通古今而無

英德不可以先言運功不可以特言建青者羣臣之議曰紹天法古
所謂非不大而理猶未稱也其曰運德建功所謂非不盛而言有未
安也易而正之寔在今日若大經緯錯綜而聲明藻色見於敷榮所
以為英文沉潛不殺而威制疆慝見於無競所以為烈武不自滿假
故以直內之謂欽博施濟衆視民如傷之謂仁自睿而作大而能化
之謂聖始於愛敬刑于四海之謂孝昔者羣臣之議無得而易矣惟
聖人包并衆美莫可形容強以命名皆非其至庶乎髣髴見于斯
伏請更定徽號曰神宗體元顯道帝德王功英文烈武欽仁聖孝皇
帝

哲宗加謚十六字詔

崇寧三年三月二十六日

朕恭惟哲宗皇帝聰明睿智天性夙成嗣服之初遵養淵默洎總威
柄發揮乾剛熙隆回修復法度熙豐之致燦然再新十有六年底

于至治而謚號所紀未能究宣朕自續承因心則友仇在典禮必極其隆仰稽追崇之文其存祖考之訓雖體道之妙莫顯於言聲而御世之經可求於擬象載揚丕烈昭示無窮宜加上哲宗皇帝謚號共為一十六字令三省樞密院官御史中丞雜學士太中大夫已上與太常寺同共集議合增徽號仍令禮官詳具典禮以聞故茲詔示想宜知悉

謚議 崇德三年七月二十三日

臣等聞聖人無名所謂必得其名者應帝王而已至欽無文所謂以進為文者行典禮而已然帝王之名垂于簡編者未嘗絕而典禮之文行于宗廟者致其顯則盡天下之至美以擬象合天下之至公以增崇是惟舊章宜在祇率恭惟哲宗皇帝清明剛健有開自天淵默沉潛發為英斷幼冲履位凝然若神灼見幾微不動聲色惟以誠孝

事于兩宮緝熙光明他無所嗜雖左右近習莫察其喜怒之色蓋如是者九年而無一日之異及其總覽威柄駿發至權雷動風行中外丕應去姦慝如振槁復法度如轉圜博收神考所用之臣聚於朝廷以爲紹述之助於是盡掃朋黨委用材能申嚴賞刑明示好惡而作人之法取士之制理財之義裕民之仁禮之廢興刑之輕重始於朝廷布在郡邑凡元祐之所變亂者次第而悉復之然後修我戎兵震讐鄰敵選練將帥恢拓土疆橫山大都既入輿地隴右酋長稽顙請歸執訊獻俘殆無虛月凡元祐之所棄捐者盡取而廣有之遠近之情歡欣鼓舞再覩熙豐之盛而所以至此者蓋在于應天以實臨下以簡致知以察邇言慎聽以聖讒說苟麗于法一視而無戚疎苟害于治畢除而無細大宵旰願治十有六年四方無虞動植咸若天不愛其道地不愛其實風雨時序日星順行神光效祥玉璽自至珍符

異瑞史不絕書至治之隆固非一言之所能盡今將圖上丕號闡揚
鴻烈則亦因其應帝王之迹推本所自而昭發之爾天被一氣之自
然成三才之妙用行乎至虛為物之始者元也惟聖時憲則效法於
此無所異焉此之謂憲元乾坤之所以闡闢日月之所以往來萬物
並由莫見其迹者道也繼之者善則運量酬酢以善承焉此之謂繼
道始則遵養用晦慎密而耄不出終則泛應曲當暉光而日新闢之
廓然被于四表非顯德乎親會通之宜御方來之變應時而造者以
莫不興為國之利者舉無遺策浮言不能惑異意不能沮非定功乎不
自以為足不忘其所恭達經緯之原順剛柔之用可謂欽文矣虛以
致其明思以合其幾運不測之神成無競之烈可謂睿武矣有萬不
同莫能一致自我總之之謂齊以天為宗以德為本六通四闢之謂
聖而昭則無小不察容光必照孝則克篤前烈通觀厥成合是數者

雖未足以窺測其緒餘而至美之所存公願之所在冒昧自竭無餘蘊矣伏請增上徽號曰哲宗憲元繼道顯德定功欽文睿武齊聖昭孝皇帝

謚冊文

臣聞昔者明王崇德廣業舉而措之天下日見之行於用則藏於仁則顯其稱名或小而取類則大故令聞廣譽克有辭於永世無得而加焉乃若德有餘於業名不稱其實未足以玉揚顯烈以端命於上帝則在我後之人恭惟哲宗欽文睿武昭孝皇帝仁覆四海十有六年肆其即位越在冲幼沉潛剛克以蒙養正動靖有度不大聲色左右僕御侍從之臣亦罔能知蓋不言者九年爰及親政率時昭考永言孝思追悼先烈弗克欽若潰于厥成放逐姦宄是正詆誣遵制揚功儀刑典則登用良善協于克一四方風動如日之中至於清靜而

寡欲體仁而繼善先後天時遇災而懼遵道貴德靡所不欽南面而
聽尊嚴若神瘳惡雖弗容貸而好善常若不及故小大祇若無侮無
拂市無剖斗祈衡之爭朝無錯立族談之犯慈故能勇外攘四裔開
闢境土克紹前人卒其武功皇天眷佑諸福畢至地不愛寶神靈自
出英聲茂實莫可殫窮未予中人祇奉顧託付以大業夙夜祇懼
弗克勝乃者姦臣乘隙復出為惡公肆抵牾用正典刑無有佚罰顯
謨丕烈既晦而明然其垂之將來昭示無極其敢不虔爰卜日至禋
于園丘袞封明神增備徽典稽諸故實協于師言自天申錫萬邦作
孚謹遣金紫光祿大夫知樞密院事上柱國南陽郡開國公食邑三
千三百戶食實封捌百戶蔡卞奉玉冊玉寶加上徽號曰憲元體道
顯德定功欽文睿武齊昭孝皇帝叅惟在天之靈降鑒于下來燕
東寧膺受茲禮於昭于天俾緝熙于純嘏

神宗謚加四字哲宗改上舊謚御筆手詔政和三年正月十一日

朕嗣承祖宗丕構懼德弗類率時昭考永惟熙寧元豐盛德大業述而明之孚于四海故自繼緒以來循親疎敦叙之詔而為之建兩京敦宗之令遵學校養士之法而申之以鄉舉里選之政追董政治官之志制名定位訓迪文武之秩紹均輸裕國之制懋遷有無阜通山海之利乘常平羨餘以惠養鰥寡使民養生送死無憾嗣開拓武功以柔遠闢國自牂牁積石列為郡縣一紀于茲迄用有成和足以廣樂富足以制禮聲明文物於是大備荷天之休諸福之物畢至錫以元圭告厥成功推原本始實自我烈考施張彌綸權輿萬事以克用又亦惟我哲宗繼志述事克篤先烈顧朕何德以堪之朕若稽古那祀成湯以衍烈祖維天下太平以告文王肆朕續述緝熙先烈其成康功永言孝思不敢不告可差官冊告永裕永泰陟神宗尊謚比祖

宗已各于六字然不著稽古建立法度之意哲宗遵制揚功亦未昭顯蓋不足慰在天之靈垂示萬世其令羣臣參議加上神宗四字改定哲宗舊謚以聞俟將來冬祀饗廟躬行奉上以稱朕功成不居歸美顯親之心咨爾中外其體至懷

配饗

趙普配饗太祖廟庭制

咸平二年二月丙申

故太師尚書令追封韓王趙普識冠人異才高王佐翊戴興運光啟鴻圖雖呂望肆伐之勲蕭何指蹤之效殆無以過也而自輔弼兩朝周旋三紀茂嚴廊之碩望分屏翰之劇權正直不回始終無玷謨猷可復風烈如生宜預享於大燕永同休於宗祐茲為茂典以答舊勲其以普配饗太祖廟庭

故樞密使檢校太師兼侍中中書令濟陽郡王曹彬配饗太

祖廟建故司空薨門下侍郎平章事贈太尉中書令薛居正
故忠武節度檢校大師同平章事贈中書令潘美故右僕射
贈侍中石熙載配享太宗廟庭八月二十五日

韓琦配饗英宗廟廷制

熙寧八年七月丁巳

功茂者賞惟其稱德厚者報不可忘故命冊張崇舊史有追封之典
祀祧躋配前書存與享之文蓋君臣之義不獨欲榮寵之於其生抑
邦家之寶亦冀顧揚之於不朽惟時故老冀我前朝式敷告於治庭
肆儀圖於典禮故永興軍節度使守司徒檢校太師兼侍中魏國公
贈尚書令韓琦才資沉偉宇量恢宏勇義出於至誠朴忠可以大受
盡瘁於國利無知而不為任重於時事雖難而必濟急澤有加於四
海謀猷實紀於三朝緬懷廟亮之勤重起淪亡之痛是用進於烈考
之清祐俾序功臣於大烝上以慰祖宗之靈下以為忠義之勸於戲

為臣至此可無愧於前良與國同休戚永傳於茂烈惟茲盛美以答
元勲可配饗英宗廟庭

宋朝大詔令集卷第一百四十二